

Nalinginnaasumik oqaaseqaatit**1. Aallarniut***1.1. Siunnersuutip tunuliaqutaa*

Inatsisartut UKA 2016/48-mi aalajangiineranni ersippoq Naalakkersuisut saqqummiussissasut inatsisissatut siunnersuummik ukiuni sisamani misiliilluni aaqqissuussinissamik, aallarnisaasunut aamma entreprenørinut mikisunut annikitsunik taarsigassarsititsisarnissamik neqerooruteqartarnissaq pillugu, aningaaseriviit nalinginnaasut aqputigalugit pissarsiarineqarsinnaanngitsunik. Aalajangiinnermit ilaatigut ersippoq aningaasat taarsigassarsiarititassat annikitsuusassasut 20.000 kr.-t aamma 100.000 kr.-t akornanniittut.

Annikitsunik taarsigassarsititsisarnermik aaqqissuussineq ujartorneqartoq atuutilersinneqassaaq nunami inuussutissarsiutinut tunngatillugu inuussutissarsiornermik siuarsaaneq pillugu Inatsisartut inatsisaannik allannguinnikkut, Inatsisartut inatsisaat taanna tunngaviummat killiliussanut aaqqissuussinerni utertitsisarnermik aallaaveqartuni atuuttuni, kalaallini inuussutissarsiornikkut siuarsaaneq nukittorsarneqarnerani. Kingullermik Inatsisartut inatsisaat allanngortinneqarpoq Naalakkersuisut aallarnisaasutut ingerlatsisunut tapersiinnaanerit periarfissaalersinneqarmat, tak. nunami inuussutissarsiutinut tunngatillugu inuussutissarsiornermik siuarsaaneq pillugu Inatsisartut inatsisaata allanngortinneqarnera pillugit inatsit (Aallarnisaasunik ineriartortitsisarnermik ingerlataqarnermut tapersiisarneq).

Siunnersuut ineriartortitseqqippoq inatsimmi tunngaviusumi siunertaasunik nunami inuussutissarsiutinut tunngatillugu inuussutissarsiornikkut siuarsaaneq pillugu suliniuteqarnermik, imaqarlunilu piumasaqaatinik aalajangersimasunik aammalu piumasaqaatinik killiliussanik, periarfissiisunik annikitsunik taarsigassarsititsisarnermik aaqqissuussinerup pissusissamisoortumik atuutilersinnissaanik.

1.2. Inatsisartut inatsisaata utertitsisarnermik aallaaveqartumik tapiissuteqartarnermik aaqqissuussineri pioreersut

Inatsisartut inatsisaanni § 5, imm. 1-imi ersippoq qinnuteqarnerup kingorna tapiissuteqarnerissamut neriorsuisoqartartoq aningaasartuutaareersunik uppersarneqartunik matussusiisarnissamik, pisuni imaattuni:

- 1) pilersitsineq amma alliliineq,
- 2) tunisassianik suleriaatsinillu ineriartortitsineq,
- 3) niuerfissanik pilersitsineq imaluunniit

4) pilersaaruserneq.

Tamatuma saniatigut imm. 2 naapertorlugu tapiissutit tunniunneqarsinnaapput aningaasat inuussutissarsiuqartunik siunnersorneqarnermut atugassanik aningaasat amerlassusii aalajangersimasut neriorsuutiginerisigut,, tamatumani aamma inatsisilerituumit imaluunniit kukkunersiuisunit ikiorneqarnermut.

Kiisalu aamma inatsimmi periarfissaqartitsisoqarpoq Naalakkersuisut aalajangersagaliorsinnaanerannut inuussutissarsiuqartit sammiviini aalajangersimasuni imaluunniit suliffeqarfinnut immikkut ittunut tapiissuteqartarnermut aalajangersagaliorsinnaanerannut, tak. inatsimmi § 6.

Inatsisartut inatsisaanni § 9, imm. 2 naapertorlugu qaffasinnerpaamik akiliuteqartoqarsinnaavoq aningaasanik uppersarneqartumik aningaasartuutaasut 50 pct.- iannik annertussuseqartunik, suliniut pillugit aallaaserisaasut naapertorlugit atorneqartunut, tunngaviusimasut inatsit naapertorlugu tapiissuteqarsinnaaneranut neriorsuutaasunut inatsimmi § 5, imm. 1 naapertorlugu.

Ileqqoq taanna nammineq aningaasalersuinissamik imaqartoq aamma atorneqarpoq inuussutissarsiuqartit suliaqarfinnut immikkut tunngasunut tapiissuteqartarnermi, nioqqutissiassanik ineriartortitsisarnermi tapiissuteqartarneq pillugu nalunaarummi aalajangersakkat naapertorlugit tunniunneqartartuni, avammut nioqqutissiassanik siuarsaaneranut, inuussutissarsiuqartit siunnersorneqarnermut ikiorserneqartarnermi (qiortakkat), sermimut aamma imermut tunngasuni suliniutini Inatsisartut inatsisaat naapertorlugu atortinneqartuni.

Oqaatigineqassaaq tamanna atuutinngimmat avammut nioqquteqartarnerup siuarsarneqarnissaani suliniutini, tak. nalunaarummi § 4.

1.3. Tapiissuteqarnissamut periarfissat allat

Periarfissaqarpoq Greenland Venturemit Namminersorlutik Oqartussat ingerlatseqatigiiffiutaannit aningaasaliiffigineqarsinnaaneq, malittarisassat naapertorlugit imminut akilersinnaasumik ingerlatsisuni suliniutini aningaasalersuisinnaasumit, suliffeqarfinnut ineriartortitsinissamut pitsaasunik periarfissaqartunut, periarfissat piusut iluaqutigisinnaajumallugit.

Greenland Venture aningaasalersuisarnermi periusissiaa pingaarnertut suliffeqarfinnut minnerusunut akunnattunullu Kalaallit Nunaanni ingerlatsisunut saaffiginnittuovoq. Taamaattoq suliffeqarfiit aamma allatigut inuiaqatigiinni kalaallini ataatsimut isigisumik soqutigisaqartut pineqarsinnaapput.

2015-imi suliffeqarfiit Kalaallit Nunaanni angerlarsimaffeqartut aamma periarfissaqalerput danskit aningaasaateqarfiannit Vækstfondenimit nioqqutissianik iluaquteqarnissamut, tak. nalunaarut nr. 816, 2. juli 2015-imeersoq, Vækstfondenimit neqeroorutaasunik Savalimmiuni aamma Kalaallit Nunaanni iluaquteqarsinnaaneq pillugu nalunaarutaasoq.

Vækstfondenili taamaattoq aningaasanik annikitsunik taarsigassarsititsisarnermik aaqqissuussaqaanngilaq, assersuutitullu oqaatigineqassaaq ineriartortitsinermut atasumik taarsigassarsiarititassanik taaneqartut minnerpamik 1 mio. kr.-ummata.

2. Siunnersuummi immikkoortut pingaarnert

Siunnersuummi aalajangersarneqarput killiliussat pingaarnert annikitsunik taarsigassarsititsisarnermik aaqqissuussinermi, inuussutissarsiornermi siuarsaaniarnermi utertitsisarnermik aallaaveqartumik ikiorsiissuteqartarnerit pioreersut tapertassaattut ilaliunneqartoq una. Siunnersuut ukiuni 4-ni misiliilluni aaqqissuussinertut eqqarsaataavoq.

Annikitsunik taarsigassarsititsisarnermik aaqqissuussinermut siunnersuut periarfissiivoq annikitsunik taarsigassarsititsisoqarsinnaaneranut 20.000 kr.-t aamma 100.000 kr.-t akornanni, taarsigassarsititsisarnerit allat assigalugit akuerineqareernerminni akilerneqartartunik. Tamatumuuna taarsigassarsititsisarneq una taarsigassarsititsisarnernut pioreersunut sanilliullugu allaassuteqarpoq, taarsigassarsititsisarnerit allat ili sarnaatigisarmassuk aningaasartuutaareersunik akiliinerusaramik, siumoortumik akiliisoqarnissaanut periarfissaqaanngitsumik.

Periarfissaassaaq aningaasartuutissatut missingersuusiasaat 75 pct.-ii angullugit taarsigassarsiarisinnaanissaat, suliniummut allaaserisaq qinnuteqaammik tunngaviusoq aallaavigalugu.

Siunnersuummilu aamma periarfissaatinneqarpoq taarsigassarsisoqarsinnaassasoq 25 pct.-i angullugu aningaasartuutissatut missingersuutaasunit, suliniummut allaaserisaq naapertorlugu, ikiorserneqarnissamik neriorsuinermi tunngaviusoq, aningaasartuutaasunik matussusiinermut tunniunneqartunik, Inatsisartut inatsisaanni pisinnaatitsineq naapertorlugu aaqqissuunneqartumik, imaluunniit tapiissuteqartarnermik aaqqissuussinermi nalunaarummik tunngaveqartumik, inatsisartut inatsisaat aallaavigalugu suliaasumik.

Aaqqissuussineq periarfissiisoq taarsigassarsiaritinneqartut tapiissutinik akuneqarsinnaanerit aningaasartuutaareersut matussuserneqarnerisigut, aamma isigineqarsinnaassaaq pisortanit annaaneqartartut killilerneqarsinnaaneritut, tamatumuunalu aamma suliniutip aningaasaqarneranik pitsaanerulersitsilluni.

Siunnersuullu aamma periarfissiivoq annikitsunik taarsigassarsitinneqartut aningaasaliissutit sulisitassat taarsigassarsitinneqarsinnaaneritut.

Taarsigassarsiarititanut qularnaveeqquisiisoqassanngilaq, aaqquissuussinerlu taamaasilluni aallarnisaasunut naleqqulluinnartuuvoq, aningaaserivinniit nalinginnaasuniit periarfissinneqartanngitsunut, taarsigassarsinermi qularnaveeqquisiinnaanngitsunut.

Taarsigassarsiarititallu niuernermi atugassarititaasut nalinginnaasut naapertorlugit tunniunneqassapput, namminersortuni inatsisitigut isumaqatigiissutaasut, taarsigassarsisup aamma taarsigassarsititsisup akornanni, tassanilu erniat akiligassat, akilersuinerup annertussusissaa, akiliutissat il.il. aalajangersarsimassallutik.

Inatsisissamut siunnersuut inatsimmut atuuttumut sanilliullugu	
<i>Oqaasertaasut maanna atuuttut</i>	<i>Inatsisissamut siunnersuut</i>
	§ 1 Nunami inuussutissarsiutinut tunngatillugu inuussutissarsiornermik siuarsaaneq pillugu Inatsisartut inatsisaanni nr. 20 3. december 2012-imeersumi, Inatsisartut inatsisaanni nr. 4, 3. juni 2016-imeersumi allanngortinneqartumi, imaattunik allannguuteqartitsisoqassaaq:
	<p>1. § 1 a-p kingorna ilanngunneqassaaq: ” § 1 b. Aningaasaliissutinik immikkoortitsisoqassaaq annikitsunik taarsigassarsititsinermit aningaasaliissutaasartussanik, aallarnisaasuaqqat aningaasalersornissaannik siunertaqartumik.</p> <p><i>Imm. 2.</i> Kommunit aningaasalersueqataallutik annikitsunik taarsigassarsititsisarnermut aaqquissuussinermit peqataanissamut periarfissaqarput. Aningaasalersueqataannissamut atugassarititaasut Naalakkersuisut aamma kommunit ataasiakkaat akornanni isumaqatigiissummi aalajangersarneqassapput.</p> <p><i>Imm. 3.</i> Imm. 1-imi annikitsunik taarsigassarsititsisarnermut aaqquissuussineq, atuutilernerata kingorna ukiut sisamat qaangiunneranni atorunnaassaaq.”</p>

	<p>2. § 5 a-p kingorna ilanngunneqassaaq: ” § 5 b. Qinnuteqartoqareerneratigut taarsigassarsititsisoqarsinnaavoq § 5, imm. 1-imi siunertanut nalunaarsorneqartunut imaluunniit aningaasaliissutitut sulisitassatut.</p> <p><i>Imm. 2.</i> Naalakkersuisullu aalajangersagaliorsimappata inuussutissarsiutini ingerlatanut imaluunniit suliffeqarfinnut aalajangersimasunut tapersiissuteqartarniarlutik § 6 naapertorlugu, aamma taarsigassarsititsisoqarsinnaavoq inuussutissarsiutini ingerlatanut pineqartunut suliffeqarfinnulluunniit aalajangersimasunut.”</p>
<p><i>”Tapiissutit annertussusiat aamma sivilissusiat”</i></p>	<p>3. Kapitali 4-ip qulequtaa imatut oqaasertalerneqassaaq: ” <i>Tapiissutit annertussusiat aamma sivilissusiat il.il.</i>”</p>
	<p>4. § 9 -p kingorna ilanngunneqassaaq: ” § 9 a. Taarsigassarsititsinissamut neriorsuummi § 5 b naapertorlugu nalunaarneqassaaq taarsigassarsiarititassat annertussusiat, 20.000 kr.-nit 100.000 kr.-nut annertussuseqarsinnaasut, taamaattoq tak. imm. 7.</p> <p><i>Imm. 2.</i> Taarsigassarsititsinissamik neriorsuinermi atugassarititaavoq aningaasartuutissatut missingersuusiat suliniummut toqqaannartumik attaveqarneri, imaluunniit aningaasaliissutitut sulisitassatut taarsigassarsiarititassanut tunngasumik.</p> <p><i>Imm. 3.</i> Aningaasat taarsigassarsiaritinneqartussat ataasiartumik imaluunniit arlalinnut agguarlugit tunniunneqarsinnaapput.</p> <p><i>Imm. 4.</i> Aningaasat taarsigassarsiaritinneqartussat annerpaamik aningaasartuutissatut missingersuusiasut 75 pct.-erisinnaavaat suliniummik allaaserinnineq naapertorlugu suliaasut, qinnuteqarnermilu tunngaviusut. Taamaattoq</p>

	<p>anigaasat taarsigassarsiaritinneqartussat annerpaamik 25 pct.-iusinnaapput, taarsigassarsitinneqarnissamut qinnuteqaammi inatsisip tapiissuteqartarnermut periarfissatut aaqqissuussai allat ilanngullugit atorneqarpata, takukkit § 5, imm. 1 aamma § 6, imaluunniit anigaasartuutissatut missingersuusiaasut 50 pct.-ii, anigaasaliissutit sulisitassat pineqarpata.</p> <p><i>Imm. 5.</i> Taarsigassarsititsineq pisassaaq niuernermi atugassarititaasut tunngavigalugit, tamatumani aamma erniat, akilersuineq, akitsuutit aamma taarsigassarsititsinermit anigaasartuutit eqqarsaatigalugit atugassarititaasuni, taarsigassarsisup aamma taarsigassarsititsinermi allaffissornikkut sullissisuusup akornanni isumaqatigiissutaasumi, tak. taamaattoq imm. 4.</p> <p><i>Imm. 6.</i> Taarsigassarsiaritinneqartunut qularnaveeqqusiiisoqartassanngilaq, taarsigassarsitinneqartussallu nalilerneqarnerani taarsigassarsititsisarnerup siunertaa isiginiarneqartassaaq, tak. § 1 b.</p> <p><i>Imm. 7.</i> Naalakkersuisut taarsigassarsititsisarnermik aaqqissuussineq pillugu ersarinnerusunik aalajangersagaliorsinnaapput, tamatumani aamma anigaasat pineqartut killissaannik.”</p>
<p>§ 10. §§ 5 aamma 5 a malillugit tapersiissutit allaffissornikkut aqunneqarnissaat pillugu kommunalbestyrelsimut imaluunniit ingerlatseqatigiiffimmut allaffissornermik suliaqartumut Naalakkersuisut isumaqatigiissuteqarsinnaapput.</p>	<p>5. § 10, imm. 1, imatut oqaasertalerneqassaaq: ” § 10. Naalakkersuisut allaffissornikkut tapiissuteqartarnermi suliassat §§-ini 5, 5 a aamma 5 b suliassat pillugit kommunalbestyrelsimut imaluunniit allaffissornikkut ingerlatsivimmut isumaqatigiissuteqarsinnaapput.”</p>
<p><i>Imm. 4.</i> Qinnuteqartoq imaluunniit suliffeqarfik ima iliorsimatillugu</p>	<p>6. § 12, imm. 4, nr. 1, imatut oqaasertalerneqassaaq:</p>

tapiiffigineqarnissamik neriorsorneqarneq imminut isumagisumik atorunnaassaaq: 1) naatsorsuutininik imaluunniit uppernarsaatininik allanik Naalakkersuisut § 10, imm. 1 malillugu pissarsiarisassaat tassani piffissaliussap iluani nassiussinngitsoortoq imaluunniit 2) akiliisinnaajunnaartussatut suliarineqarpat, imminut akisussaajunnaarsitaappat imaluunniit suliffeqarfimmik ingerlatsisinnaanermik arsaarneqarpat.	” 1) naatsorsuutininik imaluunniit uppernarsaatininik allanik § 11, imm. 1 malillugu Naalakkersuisut piumasarisimasaannik, tassani piffissamut killiliussap allassimasup iluani nassiussinngippat, imaluunniit”
	<p style="text-align: center;">§ 2</p> Inatsisartut inatsisaat 1. januar 2018 atuutilissaaq.

3. Aningaasaqarnikkut aamma allaffissornikkut pisortanut kingunerisassai

Siunnersuut tassaavoq inatsit killiliussassaaq, periarfissiisoq aningaasanik
immikkoortitsinissamut taarsigassarsititsisarnermik aaqqissuussinermi atugassanik.

Naatsorsuutigineqarpoq Inatsisartut UKA 2016 / 48-mi aalajangernerat naapertorlugu 500.000
kr.-nik aningaasanut inatsimmi immikkoortitsisoqartassasoq ukiuni sisamani, misiliinermik
aaqqissuussinerup atuuffigisassaani. Tamatumalu saniatigut naatsorsuutigineqarpoq
aningaasanut inatsimmi ukiumut immikkoortitsisoqartarnissaa aaqqissuussinermi
allaffissornikkut ingerlanneqarneranut. Kommunit periarfissaqarput aningaasaliissutinut
immikkoortitanut ilassusiinissamut.

Neriorsuuteqarnerit aningaasanillu taarsigassarsiarititanik akiliisarneq taamaallaat ukiut
tamaasa aningaasanut inatsimmi aningaasaliissutaasut iluanni pisassaaq.

Aningaasassat immikkoortinneqartut, ukiumi 1-imi taarsigassarsititsiviusimannngitsut ukiup
tullianut nuunneqarsinnaapput, taamaalilluni ukiumi ataatsimi killissaliussat ataatsimut
katillugit 500.000 koruuninit ukiuni 4-ni aaqqissuussinerup atuunnerani ukiut tamaasa
immikkoortinneqartartussatut naatsorsuutigineqartunit, tunngaviatigut
qaffasinnerulersinnaassallutik.

Akilersuutit erniallu akilerneqartut Nunatta karsianut utertillugit akilerneqassapput,
taamaalillutillu taarsigassarsiariteqqinneqassanatik.

Aaqqissuussinerup atorunnaarsinneqareernerani aningaasartuutissat peereerlugit
sinneqartooruteqartoqarsimappat taakkua Nunatta karsimut tutsinneqassapput, soorluttaaq
Nunatta karsiata annaasaqarsinnaasat nammassagai, allaffissornikkut sulisitanut
aamma/imaluunniit kommuninut allatut isumaqatigiissuteqartoqanngippat.

4. Aningaasaqarnikkut aamma allaffissornikkut inuussutissarsiortunut kingunissai
Siunnersuutikkut inuussutissarsiortunut tapiinissamut periarfissat annertusineqassapput, tamannalu naatsorsuutigineqarpoq aningaasarsiornikkut inuussutissarsiortunut pitsaasumik sunniuteqassasoq.

5. Avatangiisinut, pinngortitamut aamma innuttaasut peqqissusiannut kingunerisassai
Naatsorsuutigineqanngilaq siunnersuut avatangiisinut, pinngortitamut aamma innuttaasut peqqissusiannut sunniuteqassasoq.

6. Innuttaasunut kingunerisassai
Naatsorsuutigineqanngilaq siunnersuut innuttaasunut sunniuteqassasoq.

7. Allatigut pingaarutilinnik kingunerisassai
Naatsorsuutigineqanngilaq siunnersuut allatigut pingaarutilinnik sunniuteqassasoq.

8. Pisortanik aamma kattuffinnik allanillu tusarniaaneq
Siunnersuut piffissami 2. maj 2017-ip aamma 5. juni 2017-ip akornanni tamanut tusarniaassutigineqarpoq Namminersorlutik Oqartussat tusarniaasarnermut quppersagaanni.

Siunnersuullu aamma susassaqaqatigisani ukunani tusarniaassutigineqarsimavoq:

Naalakkersuisoqarfii tamarmik, KANUKOKA, Qeqqata Kommunia, Kommuneqarfik Sermersooq, Qaasuitsup Kommunia, Kommune Kujalleq, Kalaallit Nunaanni Sulisitsisut, SIK, Greenland Business A/S, Greenland Venture aamma Visit Greenland A/S, Bank Nordik (Nuuk), Grønlandsbanken, Kalaallit Nunaanni Politiit.

Tusarniaaffigineqartunit makkunanga tusarniaanermut akissutit tiguneqarput: Kanukoka, Qeqqata Kommunia, Kommuneqarfik Sermersooq, Kalaallit Nunaanni Politiit, Kalaallit Nunaanni Sulisitsisut, SIK, Greenland Business A/S, Greenland Venture, Aningaasaqarnermut Akileraartarnermullu Naalakkersuisoqarfik, Naalakkersuisut Siulittaasuata Naalakkersuisoqarfia.

Tulliuttuni sammineqassapput tusarniaanermut akissutaasut aamma allannguutissatut siunnersuutaasut, tusarniaanermi tiguneqartut. Oqaatigineqassaaq tusarniaanermi akissutaasut pingaarnersiorlugit taamaallaat issuarneqartarmata, aammalu tusarniaanermi akissutinit toqqaannartumik issuaasoqarsimatillugu uingasumik allanneqarlutik.

Tusarniaanermut akissutit tamarmik tamakkiisumik Inatsisartut ataatsimiititaliaannut suliassamik suliaqartumut ilanngullugit nassiunneqarput.

Kalaallit Nunaanni Politiit siunnersuummut oqaaseqaatissaqanngillat.

SIK-p siunnersuummut tunngaviusut siunnerfiit taperserpai aammalu tamatuma inuussutissarsiortunik ineriartortitseqataasinnaanissaa aamma suliffissanik nutaanik pilersitseqataasinnaanissaa neriutugalugu.

Qeqqata Kommuniata suliniut taperserpaa aammalu inatsisissatut siunnersuummut allanik oqaaseqaatissaqarani.

Naalackersuisut Siulittaasuata Naalackersusoqarfiata tikkuarpaa, ukiut sisamat misileraaffiusup naammassinerata kingorna annikitsunik taarsigassarsititsisarnermut aaqqissuussinerup qanoq naliliiffigineqarnissaa naatsorsuutigineqarnersoq, aammalu misileraaneq iluatsitsiviusimanersooq tunngavissarititaasut suut tunngavigineqassamaarnersut, inatsisissatut siunnersuummi nassuiaatini iluaqutaasumik itisilerneqarsinnaasoq.

Kaammattuineq malinneqarpoq. Nassuiaatini erseqqissarneqarpoq, naliliinermi annikitsunik taarsigassarsititsisarnermut aaqqissuussinerup aallarnisaasuaqqanut taamatullu nalinginnaanerusumik inuiaqatigiit aningaasaqarnerannut naleqarnera paasinarsisinnegassasoq, aammalu naliliinerup imarisaanut annertussusaanullu ilaatigut annikitsunik taarsigassarsititsisarnermut aaqqissuussinermi misilittagarineqalersut apeqqutaassasut.

Sulisitsisut aallaaviatigut suliniummut, inuiaqatigiinni inuussutissarsiornermi sulianik siuarsaasinnaasumut, neriulluartumik isummerput, ilanngullugu suliffeqarfimmik aallartitsinermut atatillugu aningaasassanik pissarsiniarnermik tunngavissiisoq. Taamaattoq Sulisitsisut inatsisissatut siunnersuummut arlalinnik oqaaseqaateqarput.

Sulisitsisut ilaatigut allapput: *”Inatsit ukiuni siullerni sisamani annikitsunik taarsigassarsititsinissamik aningaasaliinissamut misileraaffiusussatut isigineqarpoq. Tassunga atatillugu iluatsitsilluarnissamut tunngavissarititaasut, annikitsunik taarsigassarsititsisarnermut aningaasaliineq ukiut 4-t misileraaffiusup kingorna ingerlaqqissarnersoq – taamaattoqarpallu piumasaqaatit suussanersut – aalajangiisuusussat, GE-p ujartorpai.*

GE-p oqarnera malillugu aningaasat misileraanermut tassunga atorpeqartut ”aningaasaliissutaaqqittassanersut” aammalu suut piumasaqaatigineqassanersut, inuussutissarsiortunut taamatullu inuiaqatigiit sinnerinut nalilersuinermi tunngavissarititani pingaaruteqassaaq. Suliffeqarfiit ilaasa (aallarterlaat), aningaasalersuinissamut tunngaviusussanut atorsinnaasunut – annikitsunik taarsigassarsititsisarneit taamaassasut paasinarsissagalarpat – ukiuni 4-ni misileraaffiusussatut aalajangersagaasup qaangiutereernerani aamma ingerlaqqissinnaanissaannut tunngavissaritinneqartut ilisimanissaat pisariaqartissinnaavaat.”

Siunnersuummi § 1 b, imm. 3-mi erseqqissarneqarpoq, annikitsunik taarsigassarsititsisarnermut aqqissuussineq, atuutilernerata kingorna ukiut sisamat qaangiunneranni atorunnaassasoq. Annikitsunik taarsigassarsititsisarnermut aqqissuussinerup ingerlateqqinneqarnissaanut piumasaqaatit imaluunniit tunngavissarititaasut sioqutsisumik oqaatigineqarsinnaanngillat, tassami tamatumunnga inatsimmi allanngortitsinissaq pisariaqartussaammat.

Tamatuma saniatigut aalajangersakkanut ataasiakkaanut nassuiaatini erseqqissarneqarpoq, annikitsunik taarsigassarsititsisarnermut aqqissuussinerup naliliiffigineqarnerani annikitsunik taarsigassarsititsisarnermut aqqissuussinerup aallarnisaasuaqqanut taamatullu nalinginnaanerusumik inuiaqatigiit aningaasaqarnerannut naleqarnerata paasinarsinneqarnissaa siunertaassasoq, aammalu naliliinerup imarisaannut annertussusaanullu, ilaatigut annikitsunik taarsigassarsititsisarnermut aqqissuussinerumi misilittagarineqalersut apeqquataasusaasut.

Taarsigassarsisunut takorlooruminartuunissaa pillugu apeqquummut tunngatillugu, taarsigassarsititsinissamut isumaqatigiissummi aalajangersimasumi taarsigassarsititsinissamut atugassarititaasut aqqissuussinerup atorunnaarneranit kalluarneqartussaanngimmata oqaatigissallugu pingaaruteqarpoq. Ukiuni tallimani utertillugit akilersuinissaq piffissalernerqassasoq isumaqatigiissutigineqarpat, taanna atuuttussaassaaq. Taamatut oqareerluni, soorunami aningaasaliissutigut matussutissaqannginnissaa aarlerinaateqartillugu, taarsigassarsititsinissamut isumaqatigiissut aalajangersimasoq ilusilersorneqarsinnaanngilaq.

Aammattaq Sulisitsisut allapput: ”*Aamma siunnersuummi takuneqarsinnaanngilaq, taarsigassarsiarititat siunertamut allassimasumut atorneqarnerisut qanoq annertutigisumik nakkutigineqassanersoq. Tamanna immikkut oqaatigineqarpoq, tassami annikitsunik taarsigassarsititsinermut qularnaveeqqusiisoqartussaanngimmat.*”

Inatsisartut inatsisaanni § 12-imi pisussaataanaanani tapersiivigineqarneq pillugu inatsimmi aalajangersakkat nalinginnaasut, annikitsunik taarsigassarsititsinernut tunngatillugu atuutissaammata.

Sulisitsisut aamma makkuninnga apeqquteqarput: ”*Tamanna maannakkut naapertuutinnngissorinaraluartoq, ileqqorissaarnissaq eqqarsaatigalugu, tapersiisarnermut aqqissuussineq malillugu utertillugit akilerneqartartunik tapersiinissamut itigartitsisoqarsimatillugu suliniummut aningaasartuutit missingersuusiarineqartut 75 %-iini annikitsunik taarsigassarsititsisoqarsinnaanera eqqarsaatigineqarsinnaanersoq, paasissutissiissutigeqquneqarpoq.*”

Qinnuteqartoq inatsimmi aqqissuussinerit allat malillugit tapiiffigineqarnissamik itigartinneqarsimagaluartoq, taarsigassarsititsisoqarnissaa tunngaviatigut periarfissaqarpoq. Tassunga atatillugu eqqaamassallugu pingaaruteqarpoq, itigartitsineq pissutsinik assigiinngitsunik arlalinnik tunngavilersuutitaqarsinnaammat. Tunngaviatigut assersuutigalugu eqqarsaatigineqarsinnaavoq, tapiisarneq immikkuullarissiq naapertorlugu

anigaasartuutit utertillugit akilernerqarnissaat pillugu qinnuteqaat, tapiisarnerup pineqartup iluani anigaasassaqaqqinnineq pissutigalugu itigartinneqartariaqarsimasinnaasoq. Taamaattumik tamanna pillugu aalajangersimasumik maleruagassaqaqqarnissaq naapertuutissanngilaq imaluunniit pisariaqassanani.

Sulisitsisut tikkuarpaat: ”*Taarsigassarsiarititanut sumiginnarneqartunut nalikillilerinissamut tunngavissaqarsinnaalinnigippat, amigartooruteqarneq inaarutaasumik paasineqarsinnaassanngilaq. Tamanna ukiut 4-t qaangiutereerneranni pisimanaviannigilaq (pisimanngissinnaavoq).*” Taamaattumik tassunga atatillugu paasissutissiissutigeqquneqarpoq: ”[...] *ingerlatseqatigiiffimmut aqutsisuusimasinnaasumut, immaqaluunniit kommunimut amigartoorutit taakkua atuutsinneqarnissaat qanoq tunngaveqassasoq eqqarsaatigineqarsimanersoq.*”

Siullermik oqaatigineqassaaq, annaasaqarsimasinnaaneq ukiuni sisamani piffissap misileraaffiusup naareernerata kingorna paasineqarsinnaanngissinnaasoq, soorunami eqqormat, tassami taarsigassarsititsinermut isumaqatigiissut malillugu piffissaq utertitsilluni akilersuiffiusussa aqqissuussinerup atuuffissaata sinneranut aalajangiunneqarsimasarnera qaqutigoomat. Taamaattoq tamanna aamma aalajangiisuunngilaq, tassami amigartooruteqartoqarsimappat, allatut ingerlatseqatigiiffimmut aqutsisuusimasinnaasumut isumaqatigiissuteqartoqarsimannigippat, siunnersuummi allassimasutut, tamanna Nunatta karsianit nammaneqartussaassammat, aammalu taamaattoqarsimappat aqutsinissamut isumaqatigiissummi ajornartorsiut qanoq iliuuseqarfigineqassanersoq isumaqatigiissutigineqarsimasussaavoq.

Sulisitsisut allapput: ”[...] *taarsigassarsiarititassatut akuerineqartunut anigaasartassanut killiliussat (kr. 20.000 aamma kr. 100.000 akornanni) allaffissornikkut allanngortinneqarsinnaapput. tamanna GE-p sakkortuumik inassutiginnigilaq.*” Aammattaq allappoq: ”*Taarsigassarsiarititassanut taakkununga anigaasaliinermut tunngaviusumik tunngavissarititaasut (taarsigassarsiarititassanut killiliussat), taarsigassarsiarititassanut qularnaveeqqusiisoqartussaannigimmat. allaffissornikkut allanngortinneqarsinnaanerattanneqarsinnaanngilaq.*”

Anigaasanut killiliussat allanngortinneqarnissaannut tunngavissamut tunngatillugu eqaatsuutitsinissaq ilanngunneqartoq, tunngavissap anigaasanut inatsimmiinneranut, ataqatigiissinneqassaaq, aammalu – aarlerinaataasunik isiginnineq aallaavigalugu – aalajangiisuusussaq tassaasariaqarpoq killissaliussat ataatsimut katillugit, tassami peqatigisaanik tikkuarneqassaaq, annikitsunik taarsigassarsititsisarnermut aqqissuussineq imminermini eqaassuseqartitsinermut taaneqartumut aalajangersimasunik killissalersugaasoq tassani pineqarmat.

Aammattaq sukanninnginnerusumik akiitsorsinnaassuseqarnermut nalilersuisarnermik atuutsitsilernissaq Sulisitsisut ersarilluinnartumik inassutiginnigilaat, peqatigisaanillu oqaatigalugu: ”*Imaassinnaavoq aqqissuussineq taanna misileraanerup naammassereernerata kingorna unitsinneqarsinnaasoq. Kisianni taarsigassarsiarititassat ajornaatsumik anigaasaliivigineqartut, inunnit taarsigassarsiarititanut*

qularnaveeqquisiinnaanngitsunit taarsigassarsiarineqartut, aammalu taarsigassarsineranni aningaasaqarnikkut akiliisinnaassuseqarnerat qularnassasoq ilimanaateqartoq, tassani pineqarnerat pissutigalugu, taarsigassarsisup akiliisinnaassuseqarnera aammalu suliniutip siunertaa assigiimmik pingaartinneqartariaqaraluarput.”

Aallarnisaasuaqqanut nalinginnaasumik aningaaserivimmi tapersiivigineqarsinnaanngitsunut annikitsunik taarsigassarsititsisarneq pillugu inatsisissatut siunnersuummik saqqummiussinissamik Naalakkersuisut pisussaaffilerneqarsimmata erseqqissassallugu pingaaruteqarpoq. Tassa imaappoq siunnersuut siunnerfigineqartutut eqqarsaatigineqartunut naleqassappat, taava aaqqissuussineq nalinginnaasumik aningaaserivinnit taarsigassarsititsinermut atuuttartunit, akiitsorsinnaassuseqarnerata sukanninnginnerusumik nalilersorneqartarnissaa atuuttussaavoq. Taamaanngippat siunnersuut siunnerfigineqartunut iluaqutaanerutinneqarsinnaassanngilaq, peqatigisaanik taarsigassarsititsinermi aningaasat kr.100.000-nut killeqarnerat eqqarsaatigissagaanni.

Kiisalu Sulisitsisut siunnersuutigaat, aaqqissuussineq ingerlatseqatigiiffimmut allaffissornikkut aqutsinermik suliaqartumut imaluunniit kommunimut suliassanngortinnissaanut taarsiullugu, Naalakkersuisut – piffissami misileraaffiusumi – taarsigassarsititsisarnermut aaqqissuussaq nammineerlutik aqussagaat.

Annikitsunik taarsigassarsititsisarnermut aaqqissuussinermik aqutsinissamut tunngatillugu – sullissivitsigut imaluunniit sulisoqarnikkut – Naalakkersuisut misilittagaqanngillat imaluunniit immikkut ilisimasaqanngillat , taamaattumillu naatsorsuutigineqarpoq aaqqissuussineq ingerlatseqatigiiffimmit aqutsinermik suliaqartumit allaffissornikkut aqunneqassasoq.

KANUKOKA ilaatigut allappoq: ”*Aningaasassat ataatsimoortuutillugu aaqqissuussisoqassappat, aningaasassanit annertunerusunik qinnuteqaatinik arlalinnik tigusaqartoqarpat, aningaasassat qanoq pingaarnersiuffigineqassanersut nalornissutaalertussaavoq.”*

Taarsigassarsiarititassat siulliulluni takkuttut pillugit aallaaviusoq malillugu, aammalu aningaasassaqaartillugu, ingerlaavartumik akuerineqartassapput, tassunga atatillugu oqaatigineqassalluni, neriorsuut tunniussinerlu ukiumoortumik aningaasanut inatsimmi aningaasaliissutaasut iluanni taamaallaat pisinnaasut, siunnersuummut nassuiaatini allassimammat.

KANUKOKA aammattaaq allappoq: ”*Peqatigisaanik kommuninut suliassap nuunneqarnerani, kommunit tamatumunnga aningaasartuutitut taarsiivigineqarnissaasa tunngaviunissaa pisariaqassaaq.”*

Aaqqissuussineq kommunimit aqunneqassappat, allaffissornikkut aqutsinissamut isumaqatigiissut immikkuullarissut naapertorlugu utertitsilluni akiliisoqartartussaammat, oqaatigissallugu pingaaruteqarpoq.

Kommuneqarfik Sermersuup oqaatigaa aallarnisaasuaqqanut nalinginnaasumik aningaaserivikkoortumik taarsigassarsitinneqarsinnaanngitsunut annikitsunik taarsigassarsititsisarnermut aqqissuussamik pilersitsinissamut siunnersuutigineqartoq taperserlugu. Kisiannili Kommuneqarfik Sermersooq inatsisissatut siunnersuummut arlalinnik oqaaseqaateqarpoq.

Kommuneqarfik Sermersooq ilaatigut allappoq: ”§§ 5, 5a aamma 5b malillugit tapersiisarnerup allaffissornikkut aqunneqarnera pillugu Naalakkersuisut kommunalbestyrelsimut imaluunniit ingerlatseqatigiiffimmu allaffissornikkut aqutsinermik suliaqartumut isumaqatigiissuteqarsinnaanissaat siunnersuummi § 10-imi periarfissiissutigineqartoq, aammalu taamatuttaaq kommunit taarsigassarsititsisarnermut aqqissuussamut aningaasassanut ataatsimoortunut tapersiinissaa periarfissiissutigineqartoq, KS-ip maluginiarpaa.

Taamaattumik – aammalu annikitsunik taarsigassarsititsisarnerup unammilleqatigiinnermik equititsinninnissaata, aammalu siunertanut naleqqutinngitsunut tunniunneqannginnissaata sapinngisamik pitsaanerpaamik nalinginnaasumik qulakkeernissaa eqqarsaatigalugu – Inatsisartut inatsisissaattut siunnersuutip tusarniaanerup ingerlanerani inatsisip aqunneqarnera pillugu nalunaarummut missingiummik ilaqartinneqannginnera, KS-ip ajuusaarnartutut isigaa. KS isumaqarpoq siunissami aqutsinissaq pillugu killissaliussassanut piimasaqaatit aamma siunertaasut, immikkoortuni aalajangersimasuni ersarinngitsut.”

Aqqissuussinermut tunngatillugu allaffissornikkut najoqqutassanik ilassusiinissaq aallaaviatigut pisariaqartinneqanngilaq, tassami taarsigassarsititsisarnermut atugassarititaasut, ilanngullugit piffissaq akilersuiffiususaaq aamma ernialiusat il.il., taarsigassarsisup aamma allaffissornikkut aqutsisup akornanni taarsigassarsititsinissamut isumaqatigiissummi inunntut inatsisitigut aalajangersarneqartussaapput.

Oqaatigineqassaaq, aqqissuussineq unammilleqatigiinnermik equititsinnaasutut isigineqarsinnaanngimmat, tassami taanna nalinginnaasumik aningaaserivinni periaatsimut tapertaasussatut eqqarsaatigineqarmat.

Kommuneqarfik Sermersooq ingerlaqqilluni allappoq: ”Inatsisissatut siunnersuummut nassuiaatini allassimavoq annikitsunik taarsigassarsititsisarneq pingaartumik aallarnisaasunut aamma entreprenøriaqqanut nalinginnaasumik aningaaserivimmi periaatsitigut tapersiivigineqarsinnaanngitsunut atuutsinniarneqartoq, takuuk 1.1 Siunnersuummut tunngaviusut. Qinnuteqartoq nalinginnaasumik aningaasalersuutissanik qinnuteqarsimasooq uppernarsarneqassanersoq taamaassimappallu qanoq tamanna pissanersoq ersarinngilaq.”

Qinnuteqartoq aningaaserivimmut misiliigaluarsimassasoq aammalu aalajangersimasumik itigartinneqarsimassasoq pillugu piimasaqaatinik siunnersuut imaqqanngilaq. Kisiannili aallarnisaasuaqqanut, nalinginnaasumik aningaaserivinni inuussutissarsiornermut siunertanut taarsigassarsinnaanngikkaluartunut annikitsunik taarsigassarsititsisarnermik neqerooruteqarluni, aqqissuussinermik nalinginnaasumik aningaaserivinnut ataatsimut

isigalugu tapertaasussamik atuutsitsilernissamut siunnersuut tunngassuteqarpoq. Tamanna ilaatigut qularnaveeqqusiussiviunngitsumik aammalu sukanninnginnerusumik akiitsorsinnaassuseqarnermik nalilersuinerit atorlugit pisassaaq, takuuk siunnersuummi § 9 a, imm. 6.

Aarlerinaataasut pillugit Kommuneqarfik Sermersooq allappoq: ”Nr. 4-mut Imm. 4-mut nassuiaatit naapertorlugit, qinnuteqartumut tunngasut pinnagit, suliniutip ataqatigiinnera sammineqarnerusussaavoq. Aarlerinaataasut annikitsuinnaagaluartut, qinnuteqartut nalilersuiffigineqartarnerannut suleriaasissanik nassuiaasoqanngippat, akiliisinnaajunnaarnermik iluaquteqarniarnerit pisinnaanerat annikinnerusumik aarlerinartoqarsinnaapput. Taamatuttaaq GER-normut akeqanngillat, aammalu malinnaanissaq pillugu aammalu qinnuteqaateqarnermut atatillugu piaaraluni salloqittaannermt atatillugu pillaasinnaanissamut, piumasagaatinik ilanngussisoqanngippat, eqqarsaatigigaanni tassa suliffeqarfiliortoqarsinnaavoq, aallarnisaanermut ingerlatsinissamut pilersaarummik piviusorsiortumik suliaqartoqarsinnaavoq aammalu 100.000 koruuninik akikitsumik ”atuinermut taarsigassarsisoqarsinnaalluni”.

Taakkua, immaqalu aamma allat ersarinngitsut, nalunaarutitut ilusilimmi inatsisiliornerup ingerlanerani sumiissusersereerreqartariaqaraluarput. KS isumaqarpoq inatsisip atuutilinnginnerani allaffissornikkut aqutsinermut tunngatillugu nalunaarut aamma tusarniaassutigalugu nassiunneqartariaqaraluartoq, pingaartumik KS-ip inatsimmi siunnerfigineqartut taarsigassarsititsisarnermut aaqqissuussinermut tapersiinissaq akuersaartumik isummerfigimmagu.”

Siunnersuummi annikitsunik taarsigassarsititsisarnermut aaqqissuussinermut killissaliussat nalinginnaasut maleruagassiivigineqarput. Suleriaasissat aamma periaasissat aalajangersimasut aammalu pissutsit allat akiitsorsinnaassuseqarnermik nalilersuinermt tunngassuteqartut siunnersuummi ilanngunneqanngillat, tassami pissutsinut taakkununga allaffissornikkut aqutsisup attaveqaatai il.il. tunngaviusussaammata.

Kommunip tusarniaanermut akissuteqaataa tunngavigalugu siunnersuummi § 1 b, imm. 2-imi aalajangersagaq nutaaq ilanngunneqarpoq, tassani erseqqissarneqarluni kommunit annikitsunik taarsigassarsititsisarnermt aaqqissuussinermi peqataanissamut periarfissaqartut, aammalu piumasagaatit atugassarititaasullu erseqqinnerusut Naalakkersuisut aamma kommunit ataasiakkaat akornanni isumaqatigiisummi aalajangersarneqassasut. Taamaattumik sukumiisortai erseqqinnerusut siunnersuummi toqqaannartumik aalajangersarneqarnissaat pisariaqartinneqanngilaq. Tamanna pisariaqartoq paasinarsissagalarpat, soorunami allaffissornikkut najoqqutassanik tapertaasussanik aalajangersaasoqassaaq.

Kommuneqarfik Sermersuup tusarniaanermut akissuteqaateqarnerminut atugassatut Sermersooq Business Councilimit oqaaseqaatinik piniarsimavoq. Sermersooq Business Council inatsimmut allannguutissatut siunnersuummut aammalu ukiuni 4-ni misileraanissamut akuersaartumik isummerpoq, kisianni nunani tamalaani misilittakkat aamma suleriaatsit pitsaanerpaat eqqumaffigineqassasut kaammattuilluni.

Aningaasaqarnermut Akileraartarnermullu Naalakkersuisoqarfiup ilaatigut oqaatigaa: *”Taarsigassarsiarititanut akilersuutit akilerneqartut qanoq pineqassanersut ersarinngilaq. Taamaattumik Aningaasaqarnermut Akileraartarnermullu Naalakkersuisoqarfiup tunngavigaa, taakkua nunap karsianut utertinneqartartussaasut aammalu taarsigassarsiariteqqinneqartartussaannngitsut.”*

Akilersuutit akilerneqartut nunap karsianut utertinneqassasut aammalu taarsigassarsiaritinneqartartussaannngitsut, nassuiaatini erseqqissarneqarpoq.

Aningaasaqarnermut Akileraartarnermullu Naalakkersuisoqarfik isumaqarpoq siunnersuummi § 9 a, imm. 4 ersarinngitsaq, tassami oqaatigineqarpoq: *”Aalajangersagaq ersarinngilaq, kisianni nalinginnaasut ”niuerfimmi atugassarititaasut” malillugit pisartunit nalinginnaasuunnginnerusumik akiitsorsinnaassuseqarneq nalilersorneqartassasooq innersuussutigalugu. Akiitsorsinnaassuseqarnerup nalilersorneqarnera qanoq annikinnerutigisumik nalinginnaasuunnginnerusariaqarnera, ajornanngippat erseqqissarneqartariaqaralarpoq. Aallaavisoq tassaasinnaavoq business casemik assigisaanilluunniit neriulluarnartumik takutitsinissamik piumasaqaateqarneq.”*

Minnerpaamik business casemik (niuernermit tunngavissamik) neriulluarnartumik saqqummiussisoqassasooq, aalajangersakkanut ataasiakkaanut nassuiaatini erseqqissarneqarpoq.

Aningaasaqarnermut Akileraartarnermullu Naalakkersuisoqarfiup siunnersuutigaa: *”[...] [a]aaqqissuussaq maannakkut ersarissumik ukiuni sisamani atuutsinneqartussaammat, piffissap misileraaffiusup kingorna Inatsisartut inatsisaat ingerlaannartumik atorunnaassasooq pillugu aalajangersakkamik ilanngussisoqassasooq – tassa imaappooq ulloq 31. december 2021.”*

Piffissap ukiuni 4-ni misileraaffiusup naareernerani ingerlaannaq atorunnaarnissaa pillugu siunnersuummi § 1 b, imm. 3-imi aalajangersakkami ilanngunneqarpoq.

Greenland Businessip suliniut, piumassuseqalersitsisussaq aammalu namminersorluni ingerlanissap tikilluaqqusaanissaanut periarfissiisooq qujaruppa, kisianni inatsisissatut siunnersuummut arlalinnik oqaaseqaatissaqarluni.

Greenland Business ilaatigut allappooq: *”Annikitsunik taarsigassarsititsisarnermut aaqqissuussinerup nunami inuussutissarsiutinut tunngatillugu inuussutissarsiornermik siuarsaaneq pillugu Inatsisartut inatsisaat nr. 20, 3. december 2012-imeersumut ilanngutsinnissaa Greenland Businessip sakkortuumik inassutiginnigilaa. Tamatumunnga taarsiullugu annikitsunik taarsigassarsititsisarnermut aaqqissuussineq pillugu immikkut inatsisiliortoqartariaqaralarpoq.*

Inuussutissarsiutinik siuarsaanermut aaqqissuussinerit aamma annikitsunik taarsigassarsititsisarneq allaffissornikkut imminnut sunniivigeqatigiissinnaannngillat. Paarlattuanik ataatsimut akuleriissinneranni

*aaqqissuussinerit marluusut allaffissornikkut aqunneqarnerannik
ajornakusoortitsilertussaavoq. Tamatumunnga pingaartumik pissutaavoq, annikitsunik
taarsigassarsititsisarneq aamma tapiisarnermut aaqqissuussat sumut
atorneqarsinnaanerannut tunngavissarititaasut assigiit atuuttussaanninnerat, ilanngullugu
pingaartumik annikitsunik taarsigassarsititsisarneq tapiisarnernut aaqqissuussinernut allanut
ilanngullugu atorneqarsinnaasoq aammalu annikitsunik taarsigassarsititsisarneq
ingerlatsinermut atorneqarsinnaasoq.*

*Annikitsunik taarsigassarsititsisarneq tapiisarnermut aaqqissuussinernik nammineq
aningaasalersuutissatut ingerlatsinermullu atorneqarsinnaassappat, tamanna inatsimmi
immikkoortumi maleruagassaqartinneqarpat, aallarnisaasumut iluaqutaassaaq,
peqatigisaanillu allaffissornikkut aqutsineq oqinnerulissalluni. Taamaanngippat inatsisip
ataani aaqqissuussinertut allatuulli tunngavissarititaasut assigiit atuuttariaqaralarput.
Kingulliullugu taaneqartumi annikitsunik taarsigassarsititsisarneq annertuumik
pilerinaateqartussaannngilaq.”*

Siunnersuutip inuussutissarsiutini siuarsaarnermut inatsisinut atuutereersunut allannguutissatut
siunnersuutitut saqqummiunneqarneranut siunertaasoq tassarpiaavoq, annikitsunik
taarsigassarsititsisarnermut aaqqissuussinerup aamma akornanni
sunniivigeqatigiissitsisarnermik qulakkeerinnisaq. Annikitsunik taarsigassarsititsisarnermut
aaqqissuussaq tapersiisarnernut aaqqissuussanut utertitsisarnermik aallaaveqartunut atuuttunut
ataqatigiissillugit atuuttussaassasoq, inatsimmik immikkoortumik suliaqarnermi
allanngornaviannngilaq.

Annikitsunik taarsigassarsititsisarnermut aaqqissuussinerup nunami inuussutissarsiutininut
tunngatillugu inuussutissarsiornermik siuarsaaneq pillugu inatsimmut ilanngunneqarneranut
pissutaavoq, ilaatigut pisortat ataatsimut tapiisarnermut aaqqissuussinerit utertitsisarnermik
aallaaveqartut annikitsunillu taarsigassarsititsisarnerit suliamut pineqartumut aningaasartuutit
akuerineqarsimasut 75 procentiinik qaangerneqannginnissaat qulakkeerneqassammat.

Taarsigassarsititsisarnermut aaqqissuussamut, tapiisarnermut aaqqissuussatut
utertitsisarnermik aallaaveqartutut tunngavissarititaasunik atuutsitsisoqannginnera,
allaffissornikkut aqutsinermut tunngatillugu immikkut anigorniagassaqartussaasoq
takuneqarsinnaannngilaq. Tamanna aamma allannguutissatut siunnersuuteqarnissamut
akornutaasussaannngilaq. Aaqqissuussat utertitsisarnermik aallaaveqartut atuuttut aamma
akunnerminni assigiinnngissuteqarnerat ilisarnaataavoq. Assersuutigalugu maannakkorpiaq
qiortartakkamut aaqqissuussinernut 25.000 kr. tikillugit tamakkiisumik utertitsilluni
akiliisoqartarpoq, tunisassianik ineriartortitsinermut aningaasartuutit akuerisaasut
annerpaamik 50 procentiinik tapersiisoqartarluni.

Greenland Business allappoq: ”Greenland Business naliliivoq ”entreprenøriaqqat”qanoq
isumaqartinneqarnerisooq kiisalu ”aallarnisaasup” aamma ”entreprenørip” suna
assigiinnngissutigineriaa ersarinngitsoq. Oqariaatsit piimasaannarmik atorneqarput, kisianni
”entreprenøri” nalinginnaasumik isumaqartarpoq illuliortiternermut sanaartornermullu
suliassaqaarfimmi sulisoq. ”Aallarnisaasoq” sunaanersooq nassuiaassutivimmik Kalaallit

Nunaanni soqanngilaq, aammalu taamaaliorniarsarinissaq inassutigineqanngilaq, kisianni oqaaseq "suliffeqarfik namminersortoq" atorneqarnissaa inassutigineqarpoq.

Oqaatsitigut siunnersuummi tulluarsaasoqarpoq, tamatuma kingorna aallarnisaasuaqqat imaluunniit aallarnisaasut assigiimmik atorneqarlutik.

Kisianni aamma Greenland Businessip inassutiginnigisaatut, siunnersuut oqaatsinut nassuiaatinik aalajangersimasunik imaqanngilaq. Aammami qanoq pisoqaraluarpalluunniit taarsigassarsiarititassat aningaasartaasa annertussusaanni, aammalu aaqqissuussinerup aallarnisaasunut nalinginnaasumik aningaaserivinnit taarsigassarsitinneqarsinnaanngitsunut tunngatinneqarnerani killiliisoqarpoq. Tamanna aamma isumaqarpoq taarsigassarsititsisarnermik aaqqissuussaq suliffeqarfinnut angisuunut aamma akunnattumik angissusilinnut, nalinginnaasumik aningaaserivitsigoortumik periarfissaqanngitsunut, assersuutigalugu aningaasakilliorneq pissutigalugu, sammitinneqanngitsut.

Greenland Business ingerlaqqilluni allappoq: *"Inatsisissatut siunnersuummi § 9 a, imm. 2-mi pisut assigiinnigitsut pingasut nassuiarneqarput, tassani missingersuutinut aammalu ingerlatassap taarsigassarsivigitinneqartussap imarisaannut sanilliullugu taarsigassarsiarititassat aningaasartaasa annertussusaannut procentinngorlugu annerpaaffissaliisoqarluni. Tamanna isumaqarpugut aallarnisaasut taarsigassarsitinneqarnissaannut annertuumik ajornakusoortitsisussaasoq, peqatigisaanillu ingerlatseqatigiiffimmut allaffissornikkut aqutsinermik suliaqartumut allaffissornikkut aqutsinissamik ajornarsititsivittussaarpasilluni.*

Tassalu isumaqarpugut immikkoortoq taanna peerneqarluinnartariaqaraluartoq, taamaalilluni missingersuutit procentinngorlugu annertunerpaaffiliisoqarani. Aammalu pisuni assigiinnigitsuni assigiinnigitsunik arlalinnik annerpaaffiliisoqassanngitsaq."

Siunnersuummi illuatungaani tapiisarnermut aaqqissuussanut utertitsisarnermik aallaaveqartunut atuuttunut tunngatillugu naleqarnerulersitsinissap, peqatigisaanillu qinnuteqartoq nammineerluni nammineq aningaasalersuutissanik aalajangersimasumik annertussusilinnik akileeqataanissaanut tunngaviusup isiginiarnissaata imminnut eqqortumik oqimaatigiissinniarneqarmata, oqaatigissallugu pingaaruteqarpoq. Aammalu nammineq aningaasalersuutissat taakkua avataaneersunit aaneqarsimappata, suliassap nalilersoqqinneqarnissaa anguneqartussaavoq.

Greenland Venture annikitsunik taarsigassarsititsisarnermut aaqqissuussamik atulersitsinissaq taperserlugu oqaatigaa, kisianni inatsisissatut siunnersuummut arlalinnik oqaaseqaatissaqarluni.

Greenland Venture ilaatigut allappoq: *"Annikitsunik taarsigassarsititsisarnerup allaffissornikkut aqunneqarneranut suliassaq Greenland Businessimit, tapiisarnermut aaqqissuussinernik allaffissornikkut aqutsisuusumit allaanerusumut tunniunneqassappat, annikitsunik taarsigassarsititsisarneq aamma tapiisarneq ataqatigiissikkaanni taarsigassarsititsinerup allaffissornikkut aqunneqarnera ajornakusoortussaavoq. Siunnersuut*

atuutsiinnarneqassappat, ingerlatseqatigiiffiit allaffissornikkut aqutsinermik suliaqartut tapiissutinik taarsigassarsiarititassanillu tunniussisarnermut tunngatillugu paasissutissanik killilersugaanngitsumik paarlaasseqatigiittarnissaat pisariaqartutut isigaarput.”

Siunnersuummi immikkut oqaaseqaatini erseqqissarneqarpoq qinnuteqartut akuersissuteqartassasut taarsigassarsinermi aqutsisoq paasissutissanik pisariaqartunik tapiisarnermut aaqqissuussanut utertitsisarnermik aallaaveqartunut atuuttunut, ingerlatsinermi aqutsisumik avitseqatiginninnaasoq.

Greenland Venture ingerlaqqilluni allappoq: ”*Siunnersuummi 9 a, imm. 3 naapertorlugu [inatsisissatut siunnersuutip inaarutaasumik allannerani: imm. 5] taarsigassarsititsinermut isumaqatigiissutip allaffissornikkut aqutsisup aamma taarsigassarsisup inuit akornanni inatsisitigut isumaqatigiissutitut iluseqartinneqarnerani, taarsigassarsiarititit sumiginnarneqartut pinngitsaaliissummik akilersinniarnissaannut periarfissat ajornerulersinneqartussaapput. Isumaqatigiissut taarsigassarsisup aamma Namminersorlutik Oqartussat akornanni toqqaannartumik isumaqatigiissutigineqarpat, tamanna periarfissaasussaavoq.”*

Siunnersuut, piffissami misileraaffiusumi taaneqartumi ukiumut katillugit 500.000 koruuninik taarsigassarsiarititassat killeqartillugit, 20.000 kr. aamma 100.000 kr. akornanni annertussusilinnik taarsigassarsititsinissaq pillugu ukiuni 4-ni misileraanermut, tunngassuteqarpoq, aammalu ilaatigut eqaassuseqartitsinissaq aammalu isumalluutinik atuinissaq eqqarsaatigalugit annikitsunik taarsigassarsititsisarnermut aaqqissuussineq inuit akornanni inatsisitigut isumaqatigiissut tunngavigalugu ingerlanneqassaaq.

Greenland Venture naggataatigut tikkuarpaa: ”*Nunami inuussutissarsiutinut tunngatillugu inuussutissarsiornermik siuarsaaneq pillugu Inatsisartut inatsisaat nr. 20, 3. december 2012-imeersoq tapiissutinut tapersiisarnermullu tunngassuteqarpoq, annikitsunik taarsigassarsititsisarnermut aaqqissuussineq aallarnisaasunut aamma entreprenøriaqqanut niuerfimmi atugassarititaasut tunngavigalugit taarsigassarsititsisarnertut tunniunneqartassasoq eqqarsaatigineqarluni, taamaattumik Greenland Venture A/S-ip siunnersuutigissavaa, annikitsunik taarsigassarsititsisarneq pillugu inatsimmik immikkoortumik suliaqartoqassasoq.”*

Ilumoorpoq annikitsunik taarsigassarsititsisarneq niuerfimmi atugassarititaasut tunngavigalugit tunniunneqartassasoq. Taamaakkaluartoq aaqqissuussineq tapiisarnermut aaqqissuussatut iluseqartussaavoq, tassami aaqqissuussami nalinginnaasumik aningaaserivimmit taarsigassarsititsinermut atuuttunit sukanninnginnerusumik akiitsorsinnaassuseqarneq nalilersorneqartartussaammat. Aallarnisaasuaqqanut, nalinginnaasumik aningaaserivikkoortumik taarsigassarsisinnaanerit ajornakusoortartunut, aningaasalersuutissanik pissarsinissap ajornannginnerulernissaa, aaqqissuussinermi siunertaavoq.

Siunnersuummi aalajangersakkanut ataasiakkaanut oqaaseqaatit

§ 1-imut

Nr. 1-imut (§ 1 b, imm.1)

Aalajangersakkami aalajangersarneqarpoq annikitsunik taarsigassarsititsisarnermut aaqqissuussinermut aningaasaliissutinik ataatsimoortunik immikkoortitsisoqassasoq, aallarnisaasuaqqanut aningaasalersuisarnerup pisariinnerulersinneqarnissaanik siunertaqartunik.

(§ 1 b, imm. 2)

Kommunit annikitsunik taarsigassarsititsisarnermut aaqqissuussamut tapersiinissamut periarfissaqarput.

Atugassarititaasut piunasaqaatillu erseqqinnerusut Naalakkersuisut aamma kommunit ataasiakkaat isumaqatigiissuteqarneranni aalajangersarneqartussaassapput.

(§ 1 b, imm. 3)

Ukiuni 4-ni misileraanissaq tassani pineqarpoq, aammalu aaqqissuussineq atuutilernerata kingorna ukiut 4-t ingerlareerneranni ingerlaannaq atorunnaassaaq. Taamaattumik annikitsunik taarsigassarsititsisarnermut aaqqissuussaq, ukiuni sisamani piffissap misileraaffiusussap naanerani ingerlateqqinneqassappat, inatsisip allanngortinneqarnissaa pisariaqartussaavoq.

Aaqqissuussineq nalilersorneqassaaq, taamaalilluni annikitsunik taarsigassarsititsisarnermik aaqqissuussinerup aallarnisaasuaqqanut taamatullu nalinginnaanerusumik inuiaqatigiit aningaasaqarnerannut naleqarnera paasinarsinneqassalluni. Naliliinerup imarisai annertussusissaalu, annikitsunik taarsigassarsititsisarnermik aaqqissuussineri misilittagarineqalersut, apeqqaassapput.

Nr. 2-mut

(§ 5 b, imm. 1)

Aalajangersakkap nalunaarpaa aningaasanik taarsigassarsititsisoqarsinnaasoq siunertanut, inatsimmi § 5, imm. 1-imi aalajangersarneqareersunut, imaluunniit aningaasaliissutitut sulisitassatut. Aningaasaliissutitut sulisitassatut siullertut pingaarnertullu paasineqassapput taarsigassarsiarititat nioqqutissanut pisiniutigineqartut. Kisiannili tassani pineqanngillat aaqqissuussinerit factoring imaluunniit fakturakkut tunisinerit.

(§ 5 b, imm. 2)

Aalajangersakkap nalunaarpaa periarfissaassasoq suliniutitut aningaasanik taarsigassarsititsisinnaaneq inuussutissarsiutini imaluunniit suliffeqarfinni aalajangersimasuni, aalajangersakkanit § 6 naapertorlugu tapersersorneqarsinnaasunut.

(§ 5 b, imm. 3)

Kapitali 4-mut qulequtaq allanngortinneqarpoq, kapitali taanna aamma taarsigassarsititsisarnermi atugassarititaasunik piumasagaatinillu imaqartussaammat.

Nr. 4-mut (§ 9 a, imm. 1)

Aningaasat taarsigassarsiaritinneqartut 20.000 kr.-t aamma 100.000 kr.-t akornanniissapput. Aningaasat killingi taakkua ikkunneqarput Inatsisartuni UKA 2016/48-mi aalajangiiffigisassap oqaasertalerneqarnera tunngavigalugu, Naalakkersuisunilli aallanngortinneqarsinnaalutik, tak. imm. 5.

(§ 9 a, imm. 2)

Taamaallaat aningaasartuutitut suliniummot taarsigassarsinissamik qinnuteqaammot tunngaviusumut tunngassuteqartunut taarsigassarsititsisoqarsinnaavoq. Aningaasanik sulisinneqartussamik qinnuteqaateqarnermi, aningaasartuutissatut naatsorsuutigineqartut nalinginnaanerusumik nassuiaataasa tassani pineqarnissaa pisariaqarpoq.

(§ 9 a, imm. 3)

Allaffissornikkut aqutsisoq aalajangiisinnaavoq aningaasat taarsigassarsiaritinneqartut naafferartumik akilerneqartassasut. Qinnuteqaat aningaasanik sulisinneqartussamik tunngassuteqarpat arlalinngorlugit naafferartumik akiliuteqartarnissaq akuttunngitsumik pisariaqalersinnaavoq. Taarsigassarsianut tunniunneqartunut ernialiunneqartut kisimik akilerneqassapput.

(§ 9 a, imm. 4)

Periarfissaassaaq qaffasinnerpaamik aningaasartuutissanut missingersuusiasut ataatsimoorut 75 pct.-iisa taarsigassarsiarineqarsinnaanerat qularnaarumallugu qinnuteqartup pisariaqartumik nammineq piumasuseqarnera namminerlu aningaasalersuisinnaassuseqarnera.

Taarsigassarsitinneqarnissamik qinnuteqaat akuerineqarpat ilassuserneqarluni qinnuteqaammik aningaasartuutit ilaannik matussusiinissamik Inatsisartut inatsisaanni tapiissuteqartarnermik aaqqissuussinerit ilaanniit, qaffasinnerpaamik taarsigassarsisoqarsinnaassaaq aningaasartuutissat tamarmiusut 25 pct.-iinik. Tamanna isumaqarpoq nammineq aningaasalersuinerup 25 pct.-unissamik, qaffasinnerpaamik aningaasartuutaareersuni matussusiisoqarsinnaassammat aningaasartuutit 50 pct.-iinik, aningaasartuutini tapiiffigineqartussatut akuerisaasuni.

Aningaasat sulisitassat pineqarsimappata annertunerpaamik aningaasartuutissatut missingersuusiaasuniit 50 pct.-i qaffasinnerpaamik taarsigassarsiarineqarsinnaapput.

Killigititaasut taakku malinnissaat eqqarsaatigalugu qinnuteqartut akuersissuteqartassasut taarsigassarsinermi aqutsisoq paasissutissanik pisariaqartunik tapiisarnermut aaqqissuussanut utertitsisarnermik aallaaveqartunut atuuttunut, ingerlatsinermi aqutsisumik avitseqatiginnissinnaasoq. Taanna aamma atuuppoq siunnersuummi § 10, imm. 1 malillugu annikitsunik taarsigassarsititsisarnermut aaqqissuussineq pillugu allaffissornikkut ingerlatsinissamik isumaqatigissuteqartoqarpat.

(§ 9 a, imm. 5)

Tassani aalajangersarneqarpoq aningaasanik taarsigassarsititsinerit niuerfiusumi atugassarititaasut iluanni pisassasut. Tamanna isumaqarpoq ernianik akitsuutinillu akiliisoqartussaasoq, nalinginnaasumik aningaaserivinnit taarsigassarsinermisulli, akilersuisoqarlunilu naafferartumik. Taamaattoq aningaasanut taarsigassarsiarititanut qularnaveeqqusiisoqannginnissaa erniani aningaasartuutiniluunniit allani ersersinneqassanngilaq.

Atugassarititaasut ersarinnerusut, tamatumani aamma erniat aalajangersarneqartarneri akilersuinerlu, taarsigassarsititsinermut atugassarititaasuni ersissapput, namminersortunut eqqartuussiveqarnikkut atugassarititaasutut isumaqatigiissummi taarsigassarsisup aamma taarsigassarsianik allaffissornikkut aqutsisuusup akornanni isumaqatigiisutaasumi.

(§ 9 a, imm. 6)

Aaqqissuussinerup siunertaraa aallarnisaasartunut mikisunut aningaasalersuisinnaanerup oqinnerulersinnissaa, piumasaqartoqassanngilarlu taarsigassarsiarititanut qularnaveeqqusiissutissanik. Taarsigassarsititsisarnernup siunertaa aamma malunnartinneqassaaq akiliisinnaassutsip nalilerneqarnerani taarsigassarsiarititassanik qinnuteqarnermut atatillugu. Tamanna ersarinnerusumik isumaqarpoq suliniummi qanoq ataqatigiittoqarnera annerusumik isiginiarneqassasoq, qinnuteqartumi namminermi atugassarititaasut pinerunagit. Kassekreditimik qinnuteqartoqarpat aningaasaliissutinik sulisitassanik qinnuteqarnermut atatillugu, taava kassekrediteqarsinnaanermik naliliineq aamma suliamik suliarinninneq immikkut pissutsinik tassani atuuttunik isiginiassaaq. Tamatuma kingunerisaanik business casemik neriulluarnartumik saqqummiisoqassaaq. Aningaasaliissutit sulisitassat assersuutigalugu siunertaqassanngillat suliffeqarfimmi ajornartorsiortumi aningaasaqarnermik iluaqusiiniartussatut. Pineqartoq tassa suliffeqarfimmi peqqissooreersumi atugassarititaasunik pitsanngorsaanaasaaq.

(§ 9 a, imm. 7)

Pisinnaatitsinerup tamatuma periarfissaqartippaa taarsigassarsiaritinneqarsinnaasunut killiliussat imm. 1-imiittut allangortinneqarsinnaaneri.

Nr. 5-imut (§ 10, imm. 1)

Aalajangersagaq naapertorlugu Naalackersuisut allaffissornikkut sullissivimmut imaluunniit kommuninut taarsigassarsititsisarnermi suliassanik suliaqarnissaq pillugu isumaqatigiissuteqarsinnaapput.

Ileqqusoq tassaavoq taarsigassarsititsisarnerni allaffissornikkut suliassat allaffissornermik suliaqartumik suliffeqarfimmit isumagineqartarnerat.

Nr. 6-imut (§ 12, imm. 4, nr. 1)

Aalajangersakkami Inatsisartut inatsisaanni atuuttumi § 12, imm. 4-mi kukkusumik paragraffimut innersuussut iluarsineqarpoq.

§ 2-mut

Siunnersuutigineqarpoq Inatsisartut inatsisaat 1. januar 2018 atuutilissasoq.